

TEZAU LITURGIC
23 DECEMBRIE

ACATISTUL
SF. CUVIOS
NAUM
DE LA OHRIDA



MOSCOVA, 2000



Акафист преподобному Науму чудотворцу

Кондак 1

Возбранный чудотворче, и изрядный угодниче Христов, на вся верныя изливаяй исцеления и неистощимое чудес море, любовию хвалим тя, преподобне отче наш Науме, но яко имеяй дерзновение ко Господу, от всяких нас бед свободи, да зовем ти:

Радуйся, преподобне отче Науме чудотворче.

Икос 1

Ангела образом, земнаго суща естеством яви тебе всея твари Создатель; благоплодную бо доброту души твоя провидев, преблаженне Науме, научи всех вопити тебе сице:

Радуйся, мучениче Христов безкровный.

Радуйся, радостный трудниче.

Радуйся, цвете Божественнаго саждения.

Радуйся, лозо добродетельная винограда Христова.

Радуйся, крине райскаго прозябения.

Радуйся, предстателю всея земли Мизийския.

Радуйся, яко тобою отгонится рыдание.

Радуйся, яко тобою приносится радование.

Радуйся, преподобне отче Науме чудотворче.

Кондак 2

Видяще твоих даров изливание, Богомудре, просвещаемся душами и телесы, дивнаго тя чудотворца живоносна, Науме, разумеюще: чудесы бо яко водами, благодатию Божиею изливающимися, напаяеши верно вопиющих к Богу: Аллилуиа.

Икос 2

Разум неуразуменный вразумляя о Святей Троице, был еси просвещение Мизийския земли. Сего ради вернии научишася воспевати тебе: Радуйся, великий благочестия столпе. Радуйся, верных прибежища граде. Радуйся, твердое Православия укрепление. Радуйся, честное Пресвятыя Троицы носило. Радуйся, отче, всех преподобных украшение. Радуйся, всех богомудрых премудрая доброто. Радуйся, добре стадо свое наставляяй. Радуйся, Мизийская похвало. Радуйся, преподобне отче Науме чудотворче.

Кондак 3

Силою, данною ти свыше, слезу всяку отъял еси от лица люте страждущих, богоносе отче Науме: страждущим бо явился еси укрепление, недугующим исцеление, и всем всяк помощник показался еси, вопиющим Богу: Аллилуиа.

Икос 3

Имеяше воистинну, отче Науме, хвалебная песнь тебе воспеваема быти, любовию же твоею побеждаема, вопием ти сице:

Радуйся, сподвижнице апостолов.

Радуйся, добродетелей великих вместилище.

Радуйся, святыни чистое и честное жилище.

Радуйся, светильнице всесветлый.

Радуйся, достойный ангелов собеседниче.

Радуйся, добрый человеков наставниче.

Радуйся, яко тобою от страстей телесных избавляемся

Радуйся, яко тобою сладостей духовных исполняемся.

Радуйся, преподобне отче Науме чудотворче.

Кондак 4

Буря недоумения смущает ми ум, како достойно есть пети чудеса твоя, блаженне Науме, никтоже бо может я исчести, аще бы и многи языки имел, и глаголати восхотел; но мы дивно Богу в тебе прославляющемуся дерзаем воспевати:

Аллилуиа.

Икос 4

Слышаша, богомудре Науме, ближнии и дальнии величие чудес твоих, яко легкими благодатными крилами яко по воздуху навыкл еси сущих в неволи предваряти, скоро избавляя всех,

вопиющих к тебе таковая:
Радуйся, избавление от неволи.
Радуйся, подавание благодати.
Радуйся, нечаемых зол прогонителю.
Радуйся, желаемых благих насадителю.
Радуйся, скорый утешителю в беде сущих.
Радуйся, страшный наказателю обидящих.
Радуйся, чудес пучино, Богом излианная.
Радуйся, крепкое падающих возведение.
Радуйся, преподобне отче Науме чудотворче.

Кондак 5

Боготечная звезда явился еси, всеблаженне
Науме, научаяй словенския народы и просвещая
их светом Христовым, верныя же научил еси
Богу взывати: Аллилуиа.

Икос 5

Виде отрок и позна тя, яко великаго чудотворца,
егда тому зверя укроти и посла, яко помощника,
ниву орати. Избави и нас от зверей душегубных,
да зовем ти сице:

Радуйся, помощниче всем, тя призывающим.
Радуйся, всех неизреченная радости.
Радуйся, апостолом сопрестольниче.
Радуйся, со Ангелы служителю Святыя Троицы.
Радуйся, и нам даруй радость молитвами
твоими.
Радуйся, яко страсти нам, насылаемая

бесовскими наваждении, утишаеши.
Радуйся, помощниче наш, преблаженне, Науме.
Радуйся, теплый предстателю наш.
Радуйся, преподобне отче Науме чудотворче.

Кондак 6

Проповедует страна вся Словенская и
Мизийская тебе, преблаженне отче наш Науме,
скораго в бедах заступника: всех от злых
сохраняя, вопиющих к Богу: Аллилуиа.

Икос 6

Возсиял еси свет животный, избавление нося во
тьме смертней сидящим Мизийским землям,
свет Христов, да веруют во Единого Бога в
Триех Лицах, Нераздельную Троицу. Сего ради с
ними купно и мы благодарственно вопием ти:
Радуйся, усердно призывающим тя помогай.
Радуйся, от многобожия избавляй.
Радуйся, растерзаяй лжу яко паучину.
Радуйся, возношаяй славно истину.
Радуйся, тьму неверия прогоняй.
Радуйся, на всяком месте тя призывающим
помогай.
Радуйся, услышателю скорый.
Радуйся, бесовских сплетений прогонителю.
Радуйся, преподобне отче Науме чудотворче.

Кондак 7

Хотя неверие отгнати и показати свет истины,
многия гонения и муки претерпел еси,
преподобне отче наш Науме, И от нас убо
греховное злосмрадие отжени, да благоприятно
Богу вопием: Аллилуиа.

Икос 7

Нового тя Ноя, наставника ковчега
спасительнаго разумеем, отче святой Науме,
бурю всех лютых разгоняющаго учением своим,
тишину же божественную приносящаго
вопиющим таковая:

Радуйся, обуреваемых тихое пристанище.

Радуйся, сияние, скорбный мрак разгоняющее.

Радуйся, светило, вся концы земли
просвещающее.

Радуйся, от бездны греховныя человеки
избавляяй.

Радуйся, в бездну адскую сатану ввергаяй.

Радуйся, яко тобою дерзновенно бездну
милосердия Божия призываем.

Радуйся, яко тобою от потопа гнева
избавляемся.

Радуйся, яко тобою мир с Богом обретаем.

Радуйся, преподобне отче Науме чудотворче.

Кондак 8

Странное чудо является притекающим к тебе,
блаженне Науме, священная твоя церковь: в ней
бо и малое моление приносяще, велиих недугов
приемлем исцеление, аще токмо по Бозе
упование на тя возложим, верно вопиюще:
Аллилуиа.

Икос 8

Весь еси всем воистинну помощник, богоносе
Науме, и врач скорый всем земным, на похвалу
всех подвизая, вопити к тебе сице:
Радуйся, всяких исцелений источниче.
Радуйся, росе неботочная в знои трудов сущим.
Радуйся, подаваяй требующим благостроение.
Радуйся, люте страждущим помощниче.
Радуйся, уготовляяй просящим изобилие.
Радуйся, старым седидам силу обновляяй.
Радуйся, многих заблуждений от пути истиннаго
обличителю.
Радуйся, яко тобою благонравное житие
исправляем.
Радуйся, преподобне отче Науме чудотворче.

Кондак 9

Всякия утоли болезни, великий наш заступниче
Науме: растворяя благодатная врачевания,
услаждающая души наша, сердца же веселящая

всех усердно к помощи твоей притекающих,
Богу же вопиющих: Аллилуиа.

Икос 9

Ветия суемудренныя нечестивых видим тобою
посрамленныя, богомудре отче Науме: нас же во
православии укрепил еси. Сего ради вопием ти
сице:

Радуйся, щите, защищай благочестие.

Радуйся, мечу, посещай злочестие.

Радуйся, учителю Божественных велений.

Радуйся, лестнице, Богом утвержденная.

Радуйся, немудрых умудривый твоими словесы.

Радуйся, ленивых подвигнувый твоими учении.

Радуйся, светлосте заповедей Божиих
неугасимая.

Радуйся, луче оправданий Господних
пресветлая.

Радуйся, преподобне отче Науме чудотворче.

Кондак 10

Спасти хотя душу, плоть твою духови покорил
еси воистинну, отче наш Науме: молчанием бо
прежде и бореньми с помыслы, деянию
богомыслие приложил еси, богомыслием же
разум совершен стяжал еси, имже дерзновенно с
Богом и Апостолами беседовал еси, всегда вопия:
Аллилуиа.

Икос 10

Стена еси похваляющим, преблаженне, чудеса твоя, и всем к заступлению твоему прибегающим; темже и нас, в добродетели убогих, от нищеты, напасти, недугов и нужд различных свободдай, вопиющих ти с любовью таковая:

Радуйся, от убожества вечнаго изымаяй.

Радуйся, богатство нетленное подаваяй.

Радуйся, от мятежа и брани соблюдаяй.

Радуйся, от уз и пленения свободдай.

Радуйся, преславный в бедах заступниче.

Радуйся, превеликий в напастех защитниче.

Радуйся, брашно негиблющее алчущим правды.

Радуйся, яко тобою жизнь вечную кающися получают.

Радуйся, преподобне отче Науме чудотворче.

Кондак 11

Пение Пресвятей Троице паче иных принесл еси, преблаженне Науме, умом, словом и делом: многими бо учении веру истинную уяснил еси, верою, надеждою и любовью наставляя нас в Троице Единому Богу воспевати: Аллилуиа.

Икос 11

Светозарную лучу во мраце жития сущим неугасимую, видим тя, Богом избранне отче Науме: с невещественными бо ангельскими

светы беседеши о несозданном Троическом Свете, верных же души просвещаеши, вопиющих ти таковая:

Радуйся, озарение Трисолнечного света.

Радуйся, деннице незаходимаго солнца.

Радуйся, свеще, божественным пламенем возжженная.

Радуйся, яко угасил еси бесовский пламень нечестия.

Радуйся, светлое правоверия проповедание.

Радуйся, доброзрачное света Евангельскаго сияние.

Радуйся, яко тобою попрося поклонение твари.

Радуйся, яко тобою научихомся поклоняться Творцу в Троице.

Радуйся, преподобне отче Науме, чудотворче.

Кондак 12

Благодать данную ти от Бога сведущии, радуящися твою память празднуем по долгу, преславный отче Науме, и к чудному заступлению твоему вседушно притекаем. преславных же твоих деяний, яко песка морскаго исчести не могуще, недоумением объяти бывше, вопием к Богу: Аллилуиа.

Икос 12

Поюще твоя чудеса, восхваляем тя, всехвальне Науме: в тебе бо Бог в Троице прославляемый

дивно прославися. Тем от души псалмы и песни приносим ти, чудотворче святой, и вопием к тебе таковая:

Радуйся, рода христианскаго возвышение.

Радуйся, утешению тезоименитый.

Радуйся, всех добродетелей зеркало.

Радуйся, всех притекающих к тебе крепкое забрало.

Радуйся, по Бозе и Богородице все наше упование.

Радуйся, телес наших здравие и душ спасение.

Радуйся, яко тобою от вечныя смерти свободждаемся.

Радуйся, яко тобою безконечныя жизни сподобляемся.

Радуйся, преподобне отче Науме, чудотворче.

Кондак 13

О, пресвятой и пречудный отче Науме, утешение всех скорбящих, нынешнее наше прими приношение и от геенны избавитися нам Господа умоли, богоприятным Твоим ходатайством, да с тобою воспоем: Аллилуиа.

Сей Кондак глаголи трижды, посем Икос 1 и Кондак 1

Молитва

Тебе, угодниче Бога Живаго, Науме чудотворче, иже исполнил еси закон Бога и Спаса нашего

Иисуса Христа и сподобился еси от Него живота вечнаго, покланяемся любовию, и тя благодарим со смирением, за премногия твоя чудодействия, имиже помогаеши немощным людям и прославляеши имя Господа Бога и Спаса своего. Тебе бо, верный служителю Бога и Спаса, дадесе благодать Всесвятаго Духа бесы изгоняти, болящия исцеляти, немощныя укрепляти, страждущия утешати и во всяких скорбех помогати.

Того ради мы, недостойнии, почитаем тя, яко цевницу духовную, еюже изливается сила и небесное утешение коемуждо на потребу, и славословии прославляем Творца, Иже дарова ти таковую божественную силу и достояние. К тебе припадаем, праведниче и друже ангелов, преподобне отче наш Науме, с покаянием и умилением, не престай молитися за свой род православный пред Престолом Пресвятыя, Единосущныя Троицы, за вся притекающия и кланяющияся пред твоими святыми мощами и всечестною иконою твоею, за болящия, и в вере усопшия, за старцы и младыя, за девы и матери. Святе отче наш Науме, человеце Божий, покрый немощи наша и исцели болезни наша, молитвама твоими, скоро услыши нас и потщися в помощь нам, да никогдаже рекут невернии: где есть Бог их? О преподобне отче Науме, яви

силу твою, дарованную ти от Всемогущаго Господа, на нас, грешных рабех твоих, просвети ум наш светом святаго Евангелія, еже в житии твоём проповедал еси, и сохрани ны в целомудрии, здравии душевнем и отжени от нас пакостника диавола.

Укрепи и телеса наша здравием, яко да возможем богоугодно подвизатися и ближним нашим послужити, подаждь же нам покаяние и да в доброделании и Богоугождении поживше, обрящем милость Божию на Страшнем Судищи Христове.

Помолися, о преславне Науме чудотворче, за ны, да простятся нам согрешения вольныя и невольныя, и да очистит ны Господь Духом Своим Святым от всякия нечистоты, да достойни явимся Царствія Небеснаго, идеже с тобою прославим Святую Троицу, Яже тя прослави, Отца и Сына и Святаго Духа, ныне и присно и во веки веков. Аминь.



**ПОЛНЬІЙ
АКАФИСТНИК
КАНОНИЧЕСКІЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**